

PAAVORO ITIONCAJIAQUENERI

EPESOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncajianquenerigueti tsaromentajiacarica Jesoshi choocajianquitsica guinteninintsiqui pajitatsica Epeso. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarensi Oganejencatatsica, teetarite inquemisantajigueroji jorio itsavetantimojiavetacagnarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaquegueti Paavoro Epesoqui paperiqui Yantajiguica 18.19–20.1; 20.17-38. Tequeratagueti intioncacaanteroji ocatica paperi, itioncacaantaquero otsipa mavite paperi itigarancajianquenerica quemisantajitsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajitsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Epesoquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparato itioncacaantajiaqueneri quemisantajitsica Epesoquitica, otsipa irashijia Corosaquitica, otsipa irashi Piremoni. Isoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icantaque, tequeratagueti impeacaguemparoji Aapani Irioshi maasano ipeacaacaca, itsatsitacaquea incapiocajiaqueriquea maasano quemisantajiaquenerica Jesoquirishito, irioca jorio aisa teeca irijorijoigueji, maasanoquea irimajirontajiajempari Jesoquirishito. Chooca 3 iquempetacaacaca Paavoro antsatantajiaquemparoca ichoocashirentacajigueti Quirishito quejetaca aparato anajiaje. Jero imaica: (1) aatimpajia aquejejiacaro tsovironaqui ipeacaajitaca mapipanco, irira Quirishito irio quejetacaro mapi anaantamajatanquitsica itampaticatacotantacaroca otsipapae (2.20-22); (2) aatimpajia aquejejiacaro tsinotsi, iriraquea Quirishito irio quejetacaro aguito (4.15-16; 5.23); aatimpajia aquejetacaro manquigarentsi, irira Quirishito irio quejetacari manquigatacajica (5.25-32). Icamantajiaqueri Paavoro maasano quemisantajiaquerica Quirishito irashimirintajiaquempari ampatsini,

iquejetacaacari coareta Iromaquitica yashimirintagueti chooca yashimirintantague-tacaca (6.11-17).

1 ¹Naroguenti Paavoro itigarancane Jesoquirishito, iriotari nintacaac-
quena Aapani Irioshi. Imaica nontionca-
jiaquempiqueate maasano aviatimpajia
choocajianquitsica Epesoqui yashintajia-
caca Aapani Irioshi, aisa tsaraventama-
jajajirica Quirishito Jesoshi.

²Namanacoventajiaquempiquea
incavintsajajiaquempinijite Aapani
Irioshi aisa Amajirote Jesoquirishito,
inchoocatacaajiaquempinijite cameetsa
aatoniji pishoshoventajigarro taaca
opajitapae.

Icavintsajajiacajiquea Quirishito

³Iintsija ashineventajiguempari
Irioshite Amajirote Jesoquirishito,
iriotaque aisa Iriri, ancantajiaque caaviji
yoganejencamajata. Irio cavintsajajiacaj-
ica ontaniqui inquitequi, icavintsajajia-
majajiacaji ashirequi yashintajiacaji-
gueti Quirishito. ⁴Coramani tequerata-
gueti impeacaguemparo quepatsi
icoguiajiacajiquea inintacaajiacaji
acancaniqua antsaromentajiaquempari-
queate Quirishito ancomajatimentajia-
quemparinijite aatoniji acovaeguishe-
jijaja, aisa iramenimentajiacajiniji
quejevaecaquea teeca ancovaeguisheti-
matempaji. ⁵Aritarite iquejetaquero
imaica icantsicaroquea paesatoniqui
impeajiacaji irijanijate, ipintsajiacajita-
rite, itigarancantacarica Jesoquirishito
irimetojaventajiacaji, iriotarite
nintanquitsi Aapani Irioshi irootaque
iquejetancaroca imaica. ⁶Iintsija
ashineventajiaquempariqueate Aapani
Irioshi irooriji icavintsajamajajiacaji
itigarancuimojiaajiriquea Irijanite
ipintsamajataca. ⁷Iriotaque oguisotoajia-
jaji yovegaratantacaji iriraja, ipeacojia-

cajiroquea agovaeguishejia, caavijitari
icavintsajanti Aapani Irioshi, ⁸icavintsaj-
amajataantajiacajica, anaavaetaquetari
itsamajare, iroomajaca iguenquejane.
⁹Coramani teequeate antsajiavetempaji
intigarancuimojiaajirica Quirishito
irimetojaventajiacaji, tequeratatirajitari
ironigaanteriori icanquerica iroaquera-
gueti. Cotanquitsiquea imaica
atsajiaqueroquea, jac netsanatapoja
itigarancuqueriquea. ¹⁰Icanquetarite
coramani: “Noncapiocamajajiajeri-
queate maasano choocajiatistica jenoqui
inquitequi jerijia aisa quepatsipaequi-
tica cameetsaniji irimajironantajiaquempa-
riniji Irijani Quirishito.” Oraqueate
oncoramanitapojajeguete aapojempa-
gueti irinetsanatanaguequemparoca,
irinetsanataqueroqueate icanquea.

¹¹Icoguiajiacajiquea aatimpajia
tsaromentavaquemparineca Quirishito
intsipatimentavajajiniji jenoqui
inquitequi inquejetacaamajajiacaji-
queate irijanite. Coramanitari tequerata-
gueti onchoocatomaguetete inintacaitajia-
acajiqueate irashintajiacaji. Iriatimpa-
quea inintaquequea ariquea oncogueta-
naquempani imaica, iriotaquequea
amenaguequeroquea cameetsavaeque-
quea. ¹²Inintaqueatarite Aapani Irioshi
noshineventajiaquempariquea naatim-
pajia, noncantajiaqueriquea iriguenti
caavijica yoganejencamajata. Naroueti-
quea pariacaro noquemisantajiaqueri
Quirishito. ¹³Ariquea piquejejiacaquea
aviatimpajia iroompaquea piquemajia-
vaqueroqueti Quenquetsatsarentsima-
jajica tsavetanquerica Quirishito meshia-
jiaquempineca, paventamajajianacari-
quea, irootaquequea icoraquetantacaca
Ishire Aapani Irioshi ichoocashirentajia-

quempiquea, pitsatantajiacaca aviguentijia irijanímajajiate. Aritarite icanque Aapani Irioshi coramani intigarancaqueri. ¹⁴Arimajaquea itigaranquimojia-cajiriquea Ishire, ichoocashirentajiacajiquea aatimpajia cameetsanijite antsatimentamajiaqueniijite irinetsanajiaqueroquea Aapani Irioshi maasano icantajiacajica, intsipajianacajiqueate jenoqui inquitequi incavintsajiacajiqueate maasano aatimpajia yashintajiacaca. Iroosacanicate iintsija ashineventamajajiguempariquea, ancantajiaqueri: “Poganejencamajata.”

Paavoro yamanacoventajiaqueri quemisantajiaquerica Quirishito

¹⁵Coramani noquemacojiaquempiqueate pitsariventajiacari Amajirote Jesoshi aisa pipintsamajajiacari maasano igomajamajarejia, irootaquequea ¹⁶noquenquejantajiaquempica namaniquerigueti Aapani Irioshi nocancaniqua nocantacoventajiaquempi: “Arioteesaa.” ¹⁷Namanaqueriquea Irioshite Amajirote Jesoquirishito, iriotaquequea Aapani oganejencatatsica, namanacoventajiaquempi intsatacajaiaquempi Ishire pintsatimentamajiaqueronijite maasano inintaguetica, aisa namanakeri ironigaajiaquempi quero icota iriatimpa pintsatimentamajiaqueriniji. ¹⁸Namanacoventajiaquempiquea intsatacajaiaquempi cameetsanijite pintsamajiaqueniijite quero oncotanakuempiani oncoramanitapojagueti anchoocajiaquegueti ontaniqui iriatimpaiqui, oganejencavaetacaquea. Icajemajiaquempitarite incavintsajiaquempiniji irishinetacaamajiaquempi. Ariquea inquempetacaajiaquempari maasano igomajamajarejia. ¹⁹Aisa namanacoventajiaquempiquea pintsamajiaque iriraquea Aapani Irioshi iriguentiquea caavijica yagaveja-

majati yanaajiaqueriquea maasano, yagavejacaantajiacajicaquea aatimpajia atsarotentajiacarigueti. ²⁰Pamenejate arimajaguitatsi yagavejamajati, yonigaaanquerotarite yagavejica coramani ivochantajirigueti Quirishito imetovajetacagueti. Ariqueate yaanajiriquea jenoqui inquitequi yoguisavicajiriquea itincamijempequiqui. ²¹Yanaamatantajiacaricaqueate maasano majjirontaguetatsica, iramajirorepae, agavejaguetatsica, jivaguetatsica, maasano. Yanaajiaqueriqueate maasano choocajianquitsica imaica jerijia aisa coajicajianajatsineca. ²²Aapani Irioshi yanaacaaqueriquea Quirishito yashintacaaguecariquea maasano, aisa ipeacavajari imajjromajajiate maasano imeshiajiaqueca. ²³Aatimpajia quemisantajiaquerica aquejejiacaroquea itsino Quirishito, aroguentijia ichoocashirentamajataqueca. Iriguentiquea peacaaguetacaró maasano choocaguetatsica inetsanamajiaqueroqueate itsitacamajaguetaqueroqueate maasano.

Icavintsajiacajiqueate Aapani Irioshi yaajiajiaqueate

2 ¹Coramani oquejetacaquea metojajiaque pishirejia, pantajiavetacarotari icantimentaguetaqueca Aapani Irioshi, pipeacaajiavetacaquea covaeguisherentsipae. ²Irooquea pantapinijiavetataca, pogujatacojiaqueroquea iquenquejajiguica quepatsiquitica, piquemisantajiaqueriquea imajirote ampatsinipae quenaguetatsica otampijaguitetigueti. Iriatimpa iriguentitarite omperajigarica maasano pigatsajigarica Aapani Irioshi. ³Aatimpajia maasano aritarite aquejejiavecariqueate iriatimpajia. Aquenquejaguishevetacaquea, aisa antaguishejiavetacaquea taaca opajitapae anintajiguica. Irootaquequea icatsimatantajiavecajica Aapani Irioshi,

iquejetacaajivetacajiquea iriatimpajia.
⁴Cotanquitsiquea Aapani Irioshi
 cavintsajantamajatantatsica yagamaja-
 comajajiacajiquea, caavijitari ipintsama-
 jajiacaji, ⁵yanijacaantajiacajicaquea
 ashirequi ometojashirentavetacajigueti
 agovaeguishere, itsipatacaantajiacajiri
 Quirishito yanijacaajirigueti. (Inchiquio-
 jitaquea icavintsajajiacaji imeshiantajia-
 cajicaquea.) ⁶Ariquea itsipatacaantajia-
 cajiriqueate Quirishito Jesoshi ivochan-
 tajiajajiquea, ariqueate yaajianacaji-
 queate jenoqui inquitequi yoguisavicaji-
 avacajiquea iriatimpaqui. ⁷Iquejetaca-
 cajiquea imaica cameetsaniji oncogui-
 tempaniquea intsamajajiaque maasano
 caavijiquea ipintsamajajiacaji. Aritarite
 icotaca iriatimpa, irootaquequea
 icavintsajantajiacajica aatimpajia
 tsarotentajigarica Quirishito Jesoshi.
⁸Inchiquiojitaquea icavintsajajiaquempi-
 quea Aapani Irioshi imeshiajiaquempi-
 quea paventajiacarigueti Quirishito,
 pamenajiaquetarite arimaja imetojaven-
 tajiaquempi. Teequeate inchiquiojitsita
 pimeshiajiguempaji, inchiquiojitsitarite
 inintaquequea iriatimpa irimeshiajia-
 quempi. ⁹Tee onchoocateji ampeaca-
 guempaca aatimpa ameshiantaquempa-
 meca, arimequea aventacoquemprome-
 quea. ¹⁰Iriotaquetari peacaajiacaji
 Aapani Irioshi, imeshiajiacajiquea
 aventaventaicarigueti Quirishito
 Jesoshi. Icantashitatijaiacajiquea
 anetsanajiaqueroniji maasano cameetsa-
 guetatsica inintsitacaajiacajica coramani
 tequeratagueti anchoocajigueji.

**Ariquea aquejetavacaajiacaquea maasano
 tsarotentajigarica Quirishito**

¹¹Imaicaqueate imaica aviatimpajia
 teeca pijorijoigueji, iintsijate pinquen-
 quejajeroja queroqueate picojavetani
 coramani, manatarite teequea inconoaji-
 avetempiji jorioria yamenajiaquempi-

queate teequea pinquejiguempariji
 iriatimpajia itotsaiquijitirogueti
 ichonquimashi, irootaquequea icantan-
 tajiaquempica teequea pintsajigueriji
 Aapani Irioshi. ¹²Pinquenquejacojigüe-
 roja coramani teequea pintsajavetem-
 pariji Quirishito, yamenaquempiquea
 teequea irashintajiaquempiquea Aapani
 Irioshi jero aisa teequea pintsajavetem-
 paroji icantajiaquerica Aapani Irioshi
 ishiraerijia coramani irinetsanatavaque-
 neriquea incavintsajajiaquerigueti,
 teetari aviguenti igonorroja. Pichoocata-
 shijiavetaca quepatsiqui, tecatsi poguija-
 covetempaji, teetari pintsajavetempaji
 ininque incavintsajajiaquempi, teequea
 pintsajavetempariji Aapani Irioshi.

¹³Coramani teequeate pintsajavetempa-
 riji Aapani Irioshi, quejevetacaquea
 pichoocavaetini jmm osamani.
 Cotanquitsiquea imetojaventajiaquempi-
 quea Quirishito Jesoshi, osotoajatimen-
 tajiaquempi iriraja. Imaicaquea
 paventajiacariquea yaantajiaquempi-
 caquea, quisho yoajimpi.

¹⁴Coramani maasano naatimpajia
 jorioria nocatsimaneguintajiaquempi-
 quea maasano aviatimpajia teeca
 pijorijoigueji, tee pinquemisanteroni-
 cate itioncanaqueca Moishishini.
 Ariquea acatsimaneguintavacaajia-
 vetaca, cotanquitsiqueate imeshiajia-
 queate Quirishito, ipejairoquea
 acatsimaneguintacojiavetacaca. Imaica-
 quea teequea ancatsimatavacaajiajem-
 paji, manaquea aconoavacajiaanaca-
 quea, yamenajiacajitari Aapani Irioshi
 ariquea aquejetavacajiaquea
 maasano quemisanquerica. ¹⁵Imeto-
 jaque Quirishito itsinoqui aatonijite
 quericaca atsipeventajemparone
 irinetsanatajero itioncanaqueca
 Moishishini iroonijite irimeshianta-
 jempa. Irootaquequea imaica teeca
 ancantashitatijiaiguempaji, ariquea

aquejetavacaajiacaquea maasano irioa joriojia iriguentica teeca irijorijoigueji. Imaicaquea aquemisantajiaqueriquea iriatimpa teequea ancatsimatavacaajia-jempaji. ¹⁶Imetojaventajiacajitarite Quirishito coroshiqui cameetsanijite antsaromentajiaquempariniji, ariquiteate imaica atsaromentajiacariguete ariquiteate ashineventajiacariqueate Aapani Irioshi. Ariquiteate iquejetaca iriatimpa ishineventajiacaji maasano. Imaicaquea imaica ariquitea aquejetavacaajiacaquea atsaromentajiacariguete, teequeate ancatsimatavacaajiajempaji icameetsatacojijaajitari.

¹⁷Naatimpajia joriojia notsajiavetaro Icanquea Aapani Irioshi, cotanquitsiquea teequea nontsaromentamajajiguempariji. Aviatimpajiaquea teequea pintsatimajiavetempariji, cotanquitsiquea oraquea icoraqueequitiguete Quirishito ariquitea itsatacajaiacajiquea maasano aatimpajia quero ancojiaquempani antsaromentajiaquempariguete Aapani Irioshi arinijite antsipatavacaajiaquempaquea aatonijite acatsimatavacaajiajatsi. ¹⁸Imetojaventajiacaji Quirishito, irootaquequea nagavejantajiacaca naatimpajia joriojia nocancani noncoraquetashiqueri Aapani Irioshi namanajiguete, cotanquitsiquea teequea apaniro nagavejajigueji naatimpajia, pagavejajiguiquea aviatimpajia aisa pamanajiguete, iriguentitarite agavejacaquempi Ishire Aapani Irioshi agavejacaajiaquenacaquea. ¹⁹Coramani teequea pigonorontajiavetenaji, teequea pintsajiavetemparinica Aapani Irioshi, cotanquitsiquea imaica manaquea piquejedianajana maasano tsaromentajigarica Aapani Irioshi, pitsaromentajiacaritarite aviatimpajia aisa, irootaquequeate irijanintantajiaquempicaquea, ariquitea agonorontavacaajiacaquea. ²⁰Aquempejiacaró aisa imapipancote

itsinetacotica. Irirajiaquea itigarancanejia Jesoquirishito jerijia tsavetantajigueroa icantajiaquerica Aapani Irioshi, irio quempejiacaroca mapicotapae isavijitica itsinetacotantamajatacaca cameetsaniji onquishomajatanaqueeniji. Iriaquea Jesoquirishito, irioquea quempetacaroca mapi anaantamajatanquitsica itampaticatacotantacaroca otsipapae. ²¹⁻²²Imaica maasanoquea aatimpajia tsaromentajiacarica Quirishito aroguentijia itsovironaquite Aapani Irioshi, aroguentijia itemporete, ichoocashirentajiacajitarite Ishire. Yagavejacaajiacajiquea maasano antampishitavacaajiaquempaqueate antsaromentamajajianaquemparicaquea. Pitsipajiaquenaqueate aviatimpajia aisa, pitsaromentamajianacaritarite, aisaquea ichoocashirentajiaquempitarite Ishire.

Isavicaventica Paavoro

3 ¹Naroguenti Paavoro isantanatacojitaquea notsavetantaqueriguete Quirishito Jesoshi nosavicaventajiaquempiguete aviatimpajia teeca pijorijoigueji. ²Piquemacojiaquenampaquea icavintsajaquenaguete Aapani Irioshi itigarancaquenaguete nontsavetantimojiaquempiqueate maasano aviatimpajia teeca pijorijoigueji. ³Iriatimpa yonigaaquenaroqueate isenacavetacaca, itsatacaaquea quea notioncantavacarocaquea capichaji. ⁴Imaica papatsajavantajiaquerogueti pintsamajiaquequea arimaja notsaquero maasano yonigaaquenaca Aapani Irioshi yonigaaqueriguete Quirishito. ⁵Coramaniquea tee inchoocateji caquinte tsataqueroneca, cotanquitsiquea imaica irira Ishire Aapani Irioshi icoguiajiaquea quea yonigaaajiaquenaroquea naatimpajia itigarancanejia Jesoshi jerijia aisa

tsavetantajiguirica. ⁶Jeroquea teeca intsajavetempaji: Aapani Irioshi incavintsajajiaqueriquea maasano teeca irijorijoigueji quemisantajiaqueroca Quenquetsatsarensi Oganejencatatsica tsavetacoquerica Quirishito Jesoshi, inquejetacaaajiaquempariquea icavintsa-jajiguirigueti ishiraerijia quemisantama-jatatsica. Oraquea icantajiaquerica joriojia coramani, ariquee inquejetacaa-jiaquempariquea iriatimpajia imaica, aritarite igonorontavacaaja.

⁷Irooquee notsavetanque, icavintsaja- quenatari Aapani Irioshi inintacaaque- naquea nontsavetanqueri Jesoquirishito, irootaquequea inchiquiojitsitaquea iriatimpa itigarancaquena yagavejaca- quena. Irootaquequea imaica nagavejan- caca notsavetantaqueri. ⁸Caavijiquea yanaajiaquena maasano itsipajia tsaromentajigarica Aapani Irioshi, cotanquitsiquea icavintsajaquenaquea Aapani Irioshi itigarancaquena nontsavetantimojiaqueri teeca irijorijoig- ueji noncamantajiaqueri quero icota Quirishito, caavijiquea icavintsajamaja- jiaqueri. ⁹Iraquea Aapani Irioshi peacaaguetaroca maasano igantagaquea coramani inintaque irimeshijitajeri teeca irijorijoigueji, cotanquitsiqueate mana isenacacovecaroquea ininqueca. Ariquee itigarancaquenaquea nontsata- cajaiaqueri quero incojiaquempa cameetsanijite irimeshiimentajiajeriniji. ¹⁰Ariqueeate iquejetaca imaica ininque- quea irimeshijiaqueri quericaca tsaromentajiaquemparineca ironijite intasantajiaquempaca maasano majirontajatsica choocajatsica jenoqui inquitequi jerijia aisa agavejajatsica choocajatsica inquitequi caavijiqueate itsamajaque Aapani Irioshi. ¹¹Igantaga- quea coramani iroaqueragueti inintaque irimeshijiaqueri maasano tsaromentaji- aquemparineca Amajirote Quirishito

Jesoshi. ¹²Imaica atsaromentajiacariquea teequea antsaroajigueji amanajiguiri- gueti Aapani Irioshi, atsajiaquetarite igantagaquea iqemajiacaji. ¹³Imaica pitsajiaquequea choocatirajana acaniqui, isantanatacojiquena natsipeta- caquea, cotanquitsiquea pishinejiguem- paquea aatoquea pishimampancajia- jatsi, aviguentijitarite natsipeventajia- caca.

Paavoro yamanacoventajiaqueri Epesquitica

¹⁴Irootaquequea nogueroventantaca- rica Iraapanite Amajirote Jesoquirishito. ¹⁵Iriguentitarite ashintajigarica maasano tsaromentajigarica, irirajia choocajia- tsica jenoqui inquitequi jerijia aisa choocajatsica acaniqui quepatsiqui, icantantajitarica “irijianijiate Aapani Irioshi”. ¹⁶Iriatimpa iriguenti caavijica yoganejencamajata, aisa caaviji yagave- jamajati, irootaquequea namanantaca- rica nocanqueriquea nonintaque iragavejacaantajiaquempiri Ishire, intampishitacajiaquempi intsompogui pishirequi. ¹⁷Namanacoventajiaquemp- iquea aisa nocanqueriquea noninque incoguitempani inchoocashirentajia- quempi Quirishito, piquemisantajiaque- ritarite. Noninquequea taaca opajitapae pantajiaque picancaniquea pimpintsa- tantamajajiaquempa, ¹⁸iragavejacaajia- quempiniji aviatimpajia aisa maasano itsipajia igomajamajarejia pintsajiaque- quea caavijiquea yanaaque ipintsamaja- jiaquempiquea Quirishito. ¹⁹Atsajiave- tacaquea ipintsamajajiacajiquea Quirishito, cotanquitsiquea aatoquea agavejajiguitsi antsamajajiaqueroqueate, anaamajaquerotari apintsatantajigagueti aatimpajia caquinteja. Cotanquitsiquea nonintaquequea pintsamajajiaque caavijiquea yanaaque ipintsamajajia- quempiquea. Pintsamajajiaquerogeti

ariquea pinquenquejamajiaqueriquea Aapani Irioshi aisa inchoocamajia-quempiquea.

²⁰Caavijiquea yagavejamajataquequea iriraquea choocashirentajiacajica, yagavejaque iranaamajatavaqueroquea taaca opajita amanaquerica, jero aisa maasano anquenquejavequempaca. ²¹Irootaquequeate imaica maasano aatimpajia quemisantajiaquerica Quirishito Jesoshi iintsija ashineventajiguempariquea Aapani Irioshi. Iintsija acancaniquea ashineventajiaquempariquea. Cameetsaquea inquejejaquempa aisa maasano anchoviquijianaqueca, incoguitempani intsarorentajiaquempari ajagantsinipaequi. Ari oncoquempa.

Icantajiaqueriqueate

intispashirentavacajiaquempa maasano tsarorentajigarica Quirishito

4 ¹Notsavetacotaquerigueti Amajirote, irootaquequea isantana-tacotimentantajiquenarica. Imaica noncantajiaquempiquea pincomajamajiaquempa quea pinetsanatimenqueroniji inintacaquempica Aapani Irioshi iroaqueragueti icajemajiaquempigueti. ²Aatoquea panaanata vacaajiga, pincavintsajavacaajiaquempa quea, pamenacojianaquempa quea intati irantashijitaquempigueti. Pimpintsata vacaajiaquempa quea pantsiperejacotavacaajiaquempa. ³Imaica piquemisantajiaquerigueti Aapani Irioshi ichoocashirentajiaquempi quea Ishire, iriotaque-queate agavejacaajiaquempica pitsipata vacaantajiacaca cameetsa, piquemavacaajiacaca. Cotanquitsiquea pincoguitempani pinquejianaquempa imaica. ⁴Maasanotarite aatimpajia tsarorenta-majajigarica mana quea atsipatavacaajiacaquea quejaca quea apanironica achoocajiaque, apatirotitarite ichoocaque Ishire Aapani Irioshi

choocashirentajiacajica. Aisa maasano icajemajiacajiquea Aapani Irioshi cameetsaniji incavintsajajiacajiniji oncoramanitapojajegueti ontaniqui jenoqui inquitequi. ⁵Chooa apatiroti Amajirote, apatiroti aventajiacaca aatimpajia maasano, apatiroti aviñacajatimentajiacaca maasano. ⁶Chooa apatiroti Aapani Irioshi, iriguentiquea Aapanite aatimpajia maasano. Iriatimpa iriguentiquea Amajirojiate maasano, iriguentiquea agavejacaajiacajica maasano, aisa iriguentiquea choocashirentajiacajica maasano.

Icantashitatiacaaguecajiquea yagavejacaajiacajigueti Quirishito

⁷Caaviji icavintsajamajiacajiquea Quirishito maasano, cotanquitsiquea icantashitatiacaaguecajiquea maasano yojocaguecajigueti yagavejica antajia-querineriniji inintacaajiacajica. ⁸Itionca-cojiqueriguentiquea coramani ocanti:

“Yoanaji jenoqui, ijivajianaqueri yaajiaqueca yanaajiaqueca. Ari quea yojocajiaqueriquea caquinteja inintacaajiaque-rica.”

⁹Imaica ¿taaca opaji oncanque “yoanaji jenoqui”? Jero quea oncanque aritarite iquenapoji iroaqueragueti ontaniqui jenoqui inquitequi icoraque-quitigueti acaniqui quepatsiqui. ¹⁰Iriraquea quenapojatsica jenoqui inquitequi iriotaquequea atsomajanajatsica, yoavaetanaji jenoqui yavisanaajiro inquite, intsitanamajaguetaqueronijite maasano, yanaajiaqueriquea maasano. ¹¹Iriatimpaquea yagavejacaajiaqueriquea quemisantajiguirica irantajiaque-neriniji inintacaaguetaquerica: iconoagarantajiacaquea ipeacajiacari-queate itigarancane; itsipaquea ipeacajiacari quea tsavetantajiguiroca

icanquerica; itsipaquea yagavejacaajia-querigueti yaanaqueroquea Quenquetsatsarentsi Oganejencatatsica, itsavetantajiaquero; itsipaquea ipeacajaiacariquea quempoguijaguirica quemisantajiaatsica itsatacaajiaqueriqueate. ¹²Ariquea iquejetacaajiacajiquea maasano aatimpajia yashintajiacaca cameetsanijite agavejajiaqueniji amitacotavacaajiaquempa antampishitavacaajiaquempa arinijite anquemisantamajajianaqueri Quirishito maasano aatimpajia quejejiacaroca itsino. ¹³Acancaniquea anquejeji-anaqueroquea imaica arejevaetapojempa antsipatavacamaajiaquempagueti maasano, anquemisantamajajiaqueriquea Irijanite Aapani Irioshi, aisa antsamajajiaqueri. Ariquea anquenquevarishirentanaque, anquejemajaquempariquea Quirishito. ¹⁴Aatoquea aquejejihaaritsi chaajaniquipaetirajaca tequeratatirajaca intsajigueti, shinetimentajiaatsitirajaquea taaca opajitapae icantajiaquerica. Aatoquea aquemisantajiguiritsi cantashitatigaroca Iguenquetsatsare Aapani Irioshi. Iriatimpajiarite itsanirojiguitari yamatavijantajigui, manaquea inintajiaque intati iramatavijajiacaji aatoniji aquemisantamajajiajiriti Quirishito. ¹⁵Cotanquitsiquea aatimpajia iintsija ampintsamajajiguempariquea maasano, ancantamajataquequea anquenquetsatacaajiaquerigueti arimpanijite anquenquevarishirentanaquequea arejevaetajemparoniji anquejijianaquempariquea Quirishito anetsanajiaquerogueti maasano inintacaajiacajica, iriguentitarite Amajirote. ¹⁶Iriguentitarite agavejacaajiacajica antsipatavacantajiaquempacaqueate asavicaventajiaquerogueti taaca opajita ininqueca iriatimpa, maasanotarite icantashitatiecaaguecajiquea yagavejacaajiacajigueti antajiaque taaca opajita inintaguetica. Iroosacanicate maasanojia asavicaventa-

majajiaquerogueti ariqueate anquemisantamajajianaqueriquea antampishitavacaajianaquempaquea ampintsatavacaamajajianaquempaquea.

Aatoquea piquejejiiaatsi tequeratagueti pinquemisantajigueti

¹⁷Imaica noncantajiaquempiqueate aatoja piquejejihaaritsi teeca inquemisantajigueti quenquejaguishejiatsica intati, teenicate irininteji Amajirote pinquejejiapempacea imaica. ¹⁸Iriatimpajia ipitsecaquenquejanetanaque, teequea iranijashirentacaajigueriji Aapani Irioshi aisa teetarite irinintajigueti intsajiaqueriquea, manaquea iquishoshirentajianaque. ¹⁹Iroguentiquea yantajigui yantaguishejiaquequea taaca opajitapae covaeguisherentsi, manaquea itsanirojaquequea intati, teequea impashiventacajaguemparaji, ishineventajiacarotarite intati. ²⁰Cotanquitsiquea aviatimpajia teequea iro itsatacaajitaquempica pitsapojaquerigueti Quirishito, ²¹arimajagueti piquemajiaqueri, arimajagueti iro itsatacaajitaquempi iroomajatatsica itsatacaantica Jesoshi. ²²Imaica aatoquea piquempejiiaaquea paesatoniqui pantaguishejiavetacagueti covaeguisherentsi, aritarite picojiacani pishineventajiavecaroquea, manaquea amatavijajiaquempi. ²³Imaicampani iroaqueraro oncantanajempa pishire aisa piguenquejane. ²⁴Piroaquerashirentajianaje, irootaquetari ipeacamentantajiaquempica Aapani Irioshi pinquempejiaquempariniji iriatimpa, comajashirerimajaca pincantajempa, pincomajamajianajempa.

Icantajiaqueriqueate quero incotajempa incomajamajajiaquempagueti

²⁵Aatoquea pamatavijajiajiriti pigonoropae, manaquea pincantamaja-

taque, aatoquea picantashita intati, maasanotarite aatimpajia manaquea atsipatavacaajiaquea intati atsaroven-tajiacarigueti Amajirote Jesoquirishito.

²⁶Piquemavaquerogueti oncoraqueta-quegueti pigatsimare, aatoja picovaegui-sheta, taampinaquea pimpetsimarejajia-naje tequeratagueti ompitsequeji,

²⁷aatonijite yagavejajiguimpitsi ampatsini incovaeguishedacaajiaquempi-quea.

²⁸Irraquea aitsitantajiatsica ariotapo-jaque paitsintaque, manaquea pincatsiquetaque intati, irooca pantaji-que otsipa cameetsaguetatsica irootaquequea onchoocantaquempaca pincavintsajanquemparica coguitejacoji-anquitsica.

²⁹Aatoquea picantaguishetitsi, manaquea pincanquequea cameetsague-tatsica amijiaquerineca quemisantajia-vaquempineca pintampishitacaantajia-quemparica. Cameetsaquea pinquenque-tatacaajiaqueri irooquea pincavintsaj-anquemparica. ³⁰Aatoquea pishimam-pojancacaajigaritsi Ishire Aapani Irioshi, iriotaquetarite itigaranquimojiaquem-pica Aapani Irioshi ichoocashirentajia-quempiquea, quejetaca iseyotaquempi intsatantajitaquempaca aviguentijia irashimajaca arejevaetantapojempaca savincaguiteri iraatantajiajaverica Amajirote maasano yashintajiacaca.

³¹Imaicaquea pimpishoncajero picatsi-mashirentajiguigueti, aatoquea picatsimajencajiaji, manaquea povashi-antanajero pigatsimaca. Aatoquea pitampishijencatantajiaji, aatoquea picantashitari itsipapae. Povashiantajia-naqueroqueate maasanopae covaequi-sherentsi quejecaroca ocativa. ³²Pinca-vintsajajiaqueriqueate pigonorojia, aisa pimpintsamajajiaquempariquea. Aatoquea picatsimashirentiri itsipa querocagueti incoquempini, manaquea

pimpeacotajemparo intati, pinguempeji-aquempariqueate Aapani Irioshi ipeacotsitajimpirogueti picovaeguisheji-acagueti, aatoquea icatsimatimentim-piro, paventajiacaritarite Quirishito.

Icantajiaqueriqueate inquenjejaquempariqueate Quirishito

5 ¹Aviatimpajia aviguentijiarite irijanijiate Aapani Irioshi ipintsa-majajiacaca, imaica pinquejejaquempa-riqueate iriatimpa. ²Picancanija pimpin-tsatanamajataquempa, quejetaca Quirishito ipintsamajajiacaji ipimantan-tacaroca imetojane imetojaventajiacaji-quea. Irootaque oquempetaroca cameetsajencatatsica yojocajitaquene-rica itaajitaquenerica Aapani Irioshi, ishineventavacaro.

³Aatoquea poashitimajiguirotsi manquigarentsi teeca irooquea pimanquigare. Ari pinquejejaquempa-quea aisa manquigarentsijia, aato poashitiritsi shirampari teeca irio pimanquigare. Aatoquea piquenquejaco-timajiguirotsi taaca opajitapae covaequishedatsica. Aato pinintsigueteri yashintaguecaca itsipa, aisa aatoquea pinintavaque pinintavaque. Icoguiajia-quempitarite Aapani Irioshi pincomaja-majajiaquempaniji. ⁴Aatoquea piquen-quejajiguitsi taaca opajitapae oguipashi-ventajantatsica. Aatoquea picantagui-shejigui intati, aisa pinquenquetsataque-gueti aatoquea piconoantavacaro covaequisherentsi, manaquea pinquen-quetsajiaque cameetsa pishineventajia-quempariqueate Aapani Irioshi cavintsajajiaquempaniji. ⁵Pitsamajajiaquetarite aato yogui ontaniqui imajirontagueti Quirishito jeri aisa Aapani Irioshi quericaca oashitiroca manquigarentsi, jeri aisa antaguisheditiroca taaca opajitapae covaequisherentsi, jeri aisa nintsiguerica itsipa yashintagueta-

caca, jeri aisa quejecarica irinintavaque irinintavaque. Iriraqueate nintatsica irajaarantamajaquempa quejevaetacaquea manacaquea iroguenti irioshivijique irajaararopae. ⁶Inchiquiojitaja yamatavijajiguimpitsija cantashijiatsica intati. Icatsimamajajiguiritarite Aapani Irioshi maasano quejejuguiroca imaica teeca irinintajigueji inquemisantajigueriji. ⁷Irootaquequea noncantantajiaquempica aatoquea pitsipaguishejigari ritsi iriatimpajia.

⁸Paesatoni oquejeveca pipitsecacojiaque iroorijite pantaguishejiavetacaqueate taaca opajitapae covaequisherentsi teenicate pintsajiavetempariji Aapani Irioshi, cotanquitsiquea imaica pitsajiaqueriquea piquemisantajiaquerigueti Amajirote, quempecaquea itsirencacotapojajimpi. Irootaquequea noncantantajiaquempica: arimpaquea pinquempjianajempariquea choocata-tsica savincaguiteriqui, manaquea pincomajamajajianaquempa. ⁹Maasano tarite tsamajajiguirica manaquea icavintsajantajiguiquea intati, icomajamajajigaquea, aisa icantamajajiaquequea, teequea iramataajiguempaji.

¹⁰Irooqueuea pintsajiaque ishineventaguetaca Amajirote. ¹¹Aatoqueate pishineventimajjaarotsi maasano yantaguishejiaqueca irirajia pitsecacojianquitsica, manaquea pincantimentantajiaqueroquea, teetarite irishineventemparoji Aapani Irioshi. ¹²Aato ocameetsati anquenquetsaguishetacotsitantaquero-gueti taaca opajitapae yantaguishejiguetica imanavecaca, oguipashiventajantarite intati. ¹³⁻¹⁴Cotanquitsiquea aviatimpajia pincomajamajajiaquempagueti, iriraquea antaguishejiguiroca covaequisherentsi inchiquiojitsitarite iriatimpajia iramenajiaquempa manaquea icovaequishejiaca, iroompaquea arica irinintajiaquequea inquejeja-

naquempi aviatimpajia inquemisantajia-naqueriquea Quirishito. Irootaquequeate itioncacojiqueroqueti ocantiquea:

“Pintinajanaquequea aviatimpa maanquitsica, aviatimpa metojanquitsica pimpo-chatanajequea, ariquea intsirencacotaquempiquea Quirishito.”

¹⁵Imaica pincomajajiguempaqueate aatoquea piquempelijjaaritsi teeca intsajigueji, manaquea pinquejejiaquempariquea tsajiatatsica icomajajigagueti.

¹⁶Pisavicaventamajajiaqueroqueate pantsipeventamajajiaquempariquea Aapani Irioshi imaica, choocatarite oshequini antaguishejiguiroca covaequisherentsi. ¹⁷Irootaquequea noncantantajiaquempica aatoquea piquejigari teeca intsajigueji inquenquejajigue, manaquea pincantajiaqueriquea Amajirote intsataca-jaiaquempiro maasano inintaqueca pantajiaqueca. ¹⁸Aatoqueate pishinquijiga, piquenanaquetsiqueate picovaequishetatsi. Irooqueuea pinintamajate inchoocamajatanaquempi Ishire Aapani Irioshi. ¹⁹Pinquensatavacaajiaquempaquea, pincantsitemparoquea ocanqueca amashairentsipae itsariventantajitarica Aapani Irioshi.

Pamashaiventajiaqueri Amajirote, pintsariventamajajianaquempariquea onquenavaetanaque pishirequi. ²⁰Paventajiacaritari Amajirote Jesoquirishito imaica, iintsija pincoguitempani pishineventajiaquempariquea Aapani Irioshi pincantapinataqueriquea: “Ariotelesaa”, iroorijite icoguitaniqua icavintsajajiaquempiquea.

**Quero incojiaquempani
inchoocajiaqueniji cameetsa
manquigajiatatsica aisa imanquigare**

²¹Arigueti pitsariventamajajiacari Quirishito aatoquea pinintajiguitsi panaanaatavacajiaquempaquea,

maasanoquea pinquemisantavacaajia-
quempaja pamitavacaajiaquempaquee
intati.

²²Manquigarentsijia, pinquemisanta-
majajiaqueri manquigatimpica quejeta-
caquee piquemisanquerigueti Amajirote.

²³Irraqueate shirampari iriguentitarite
jivatiroca imanquigare iquejetacari-
queate Quirishito ijivajiguirigueti
maasano tsarorentajigarica, aisa
irioquea meshiajiaquerica. Irraquea
Quirishito yamenajiaqueri quemisantaji-
atsica quempetacaquee iriojia itsino,
Quirishito irio quejecaroca iguito.

²⁴Aritarite oquejetacaquee imaica
maasano tsarorentajigarica iquemisan-
tajiakeriquea Amajirote Quirishito,
ariquea onquejiaquempaquee manqui-
garentsijia onquemisantamajajiaque-
ri-queate manquigataroca, aatoquee
opigapigatsajigariquea.

²⁵Shiramparijia, pimpintsamajajia-
quemparoqueate pimanquigare, pinque-
jiaquempariqueate Quirishito
ipintsamajajiacarigueti maasano
tsarorentajigarica, iquejetacaacari
imanquigare, ipacaro imetojane
imetojventaqueroquee, ²⁶cameetsani-
jite irogameetsantajiaquero, apanironi-
jite irashintajiaquemparo. Isaancanta-
caro iquivantacaro oja aisa iguenquetsa-
tsare.^a ²⁷Ininquetarite iramajero
intsipataquemparo, aato opintatimata,
aato otsiñoamagoti, aato ochoocati
quejecaroca, manaquea oganejencata-
quempa oncameetsamajataque. Ariquea
inquejetacaajiaquempari maasano
igapiothane, iroganejencatacaajiaquem-
pari. ²⁸Imaica aviatimpajia shirampa-
rijia, pimpintsajiguemparojate
pimanquigare pincavintsajajiaquero-

quea pinquejetacaajiaquemparo
pipintsajigagueti aviatimpa. Irraquea
cavintsajiroca imanquigare irisatiquea
cavintsajaatsi. ²⁹Tecatsi sematsine itsino
iriatimpa, maasanoquee acavintsajajia-
caquee ashecajiacaquea aatonijite
ametojajiguetsi, aisa amenanontajiac-
aquea aatoniji taa oajigaji. Ariqueate
iquejetacaajiacariqueate Quirishito
maasano tsarorentajigarica ipintsajiga-
rigueti. ³⁰Aatimpajia aisa tsarorentaji-
garica maasanoquee atsipajiacariqueate
atsarorentamajajigarigueti quejevaeca-
quee aroguentica itsino, irootaquequee
icavintsajantajajajica. ³¹Ariquea
itioncacojiquerogueti ocanti: "Iroota-
quequee imaica shirampari intsinampi-
rejanaqueriqueate iriri aisa iriniro,
quisho iroamajataquero imanquigare,
apatsinoroquee incantanajempa.
Ariquea iroaqueragueti tequeratagueti
irimanquigatemparoji, mavite icarajia-
vetaca, ariquea imanquigacarogueti
ariqueate icojianaca tee irimavitetajem-
paji, quempetanajaqueate apatsinoro-
nica icantaja." ³²Omanavecaquee
ocatica, cotanquitsiquea mana nocanta-
jiaquempiroquee irooquee pintsatantaji-
aquempaca ariquea iquejetacaajiacaji-
quee Quirishito maasano aatimpajia
atsarorentajigarigueti. Itsipajiacaji-
queate iriatimpa quejevaecaquee
aparoquee acantaja, quishoquee
yoajiacaji. ³³Noncantsijajempiqueate
aisa maasanopae shirampari impinsa-
majataquemparoqueate imanquigare,
incavintsajaqueroquee inquejetaca-
quemparoquee icavintsajagueti
iriatimpa. Aisa maasanopae manquiga-
rentsi onquemisantamajajiaqueriquea
manquigataroca.

a 5.26 Coramani ontaniqui Joreaqui yamejigaca irooshipojigueti irimanquigajitaquemparo
manquigarentsi, otsipataca onquivamajataquero aisa onetsanamajataquero
onquitsaatajemparo saancamorenaro teeca ontsiñoamagoteji.

**Quero incojiaquempani irijanintajatsica
aisa irijanijate**

6¹Aviatimpajia chaajaniquipaetirajaca, arigueti piquemisantajiaqueri Amajirote ininque pinquejetacaitempaquea piri aisa piniro pinquemisantajiaqueriqueate, caavijiquea ocameetsati pinquejetaquerogueti imaica. ²⁻³Paesatoniqueate Aapani Irioshi icantavecariqueate Moishishini taaca opajitapae, ariquea itioncacoguequeroquea cameetsanijite irinetsanajiaquero avaesatinijiateni, cotanquitsiquea teequea incanteji irinetsanajiaquerogue-tiquea maasano osamaniqueate inquishojiaque acaniqui quepatsiqui. Cotanquitsiqueate choocaquea apatiroti icantaquerica irinetsanataquerogueti osamaniquea inquishojiaque acaniqui quepatsiqui, irootaquequea ocatica: “Pinquenquejacameetsatacotaquerija piri aisa piniro.”

⁴Aviatimpajiaquea irijanintajatsica, aatoquea picatsimatacaashijigaritsiquea intati pirijanijiate aisa porijanijiate, manaquea pintsatacaajiaqueriquea maasano icanqueca Amajirote, aisa pincantomajajiaqueriquea irantajiaque-guetei covaeguisherentsi.

**Quero incojiaquempani yashintajitaca
aisa ashincarica**

⁵Aviatimpajia yashintajitaca, pinquemisantamajajiaqueriqueate ashinquempica acaniqui quepatsiqui, aatoquea pipigapigajigari manaquea pintsaroacaajiaquempariqueate, aisa aato pamatavijajiguri, manaquea pincatsiquejiaqueneriqueate quempecaquea iriguentica picatsiquejiaqueneca Quirishito. ⁶Aatoquea apatiroti pinetsanajiguirotsi icantajiaquempica yamenajiaquempiguetei irooqueate pishineta-caantajiaquemparica, picancaniquea

pincatsiquemajajiaquequeate, iriotaquetari ashintamajaquempica Quirishito, aviguentijiarite irajaanirejia Quirishito. Pinintamajajigueja pinetsanamajajiguero maasano inintaguetica Aapani Irioshi. ⁷Pinetsanamajatanaque-roja incanquempiguetei ashinquempica quejecaquea irioquea pantamajaquene Amajirote Quirishito, aatoquea aparoquea pishinetacagari papicaquinteni. ⁸Pitsajiaquetarite iriraquea Aapani Irioshi irishineventajiaquempariquea maasano antiroca cameetsatsica, irivegarajiaqueneriquea. Inquejetacaajiaquempariquea irirajia yashintajitaca, jerijia aisa teeca irashintajitempariji, maasano.

⁹Aviatimpajiaqueate ashintajigarica caquinte yojocantajitica, iintsijate pinquenqueajigueroquea ocatica. Choocaqueate apaniromajaca ashintajiguempica aviatimpajia jerijiaquea aisa pashintajiacaca, iriatorite pimajiromajate choocatatsica jenoqui inquitequi. Iriatimpaquea yamenajiaquempi teequea pincantashitatijaiguempaji, ariquea piquejetavacaajiacaquea maasano. Irootaquequea noncantantajiaquempica pincavintsajajiaqueriqueate pashintajiacaca, aatoquea picatsimajiguiritsi.

**Quemisantajatsica iquejetacariquea
ashimirintajatsica**

¹⁰Napitsariventarijiate, apanivani-queate noncantajiaquempiqueate, aviguentijiarite tsaromentajigarica Amajirote imaica pamaneriquea pincantajiaqueri intampishitacaamajajiaquempi, aisa iragavejacaamajajiaquempi, caavijitarite yagavejamajati.

¹¹Iriaqueate ashimirintajatsica yashimirintavacaajiacaguetei iroguente-quea yaventajiga iguishoritepae aatoniji isatajajitiri. Imaica aviatimpajia pinque-

jejianaquempariquea paventajiana-
quempariqueate Aapani Irioshi irojocaji-
aquempiquea maasano pimpigatantajia-
quemparica ampatsini aatonijite yagave-
jajiguimpitsi yamatavijajiguimpitsi.

¹²Aatimpajiaqueate teetari iriguenti
ashimirintajiguempa choocatanquitsica
itsino, iriraja. Iriguentijiaquea
ashimirintajiaquea majirontajiavetan-
quitsica teeca inconijajigueji, irirajia
tigarancajiaquerica quemisantajiaque-
rica, iriguentijia agavejajiaquerica
pitsecashirentacojianquitsica acaniqui
quepatsiqui, iriguentijia ampatsinipae
quenaguetanquitsica inquitequi
peacagaroca covaeguisherentsi.

¹³Irootaquequeate nocantantajiaquem-
pica imaica, pinquejetempariquea
ashimirintatsica yaventarogueti iguisho-
ritepae, paventamajajiaquempariquea
aviatimpajia Aapani Irioshi yojocaquem-
pitari maasano pimpigatanquemparica
ampatsini pagavejajiaquenijiji pintampi-
shitashitimentajiaquerinijite incoraque-
tashijiaquempigueti, aatonijite yagave-
jajiguimpitsi, manaquea pinquemisanta-
majajianaqueriquea Aapani Irioshi.

¹⁴iPintimanaqueshiatsi! Picancani-
quea pinquenquejajiaqueroqueate
maasano arimajatatsica teecaquea
amatavijanteji, oquejetacaquea
yoishotacomajatacarogueti ashimirinta-
tsica ichompimashite. Pincomajamajaji-
aquempaquate pinquejetantanaquem-
paricaquea ashimirintatsica yavencaro-
gueti isavoneguitaaca. ¹⁵Quejetacaquea
irira ashimirintatsica icavimajatanaca-
queate cameetsanijite iranijitantana-
quemparonijite, ariqueate pinetsanata-
naquempaquea poajianaquequea,
pinquenquetsatacaapojeriquea
caquintepae pintsatacaajipojeriquea
Quenquetsatsarentsi Oganejencatatsica
inchoocatantajiaquempaca cameetsa.

¹⁶Aisa choocaquea ashimirintatsica

iticaancaca, iticaantavacaroquea
shiquiripi morecatsica aatonijiji iquentaji-
tiri. Aisa aviatimpa, paventamajatana-
quemparija Aapani Irioshi, pinquemi-
santamajatanaqueriquea aatonijite
yagavejimpitsi ampatsinipae incovae-
guishetacaquempiquea. ¹⁷Aisa,
quejetacaquea ashimirintatsica yasatiri-
jarogueti cavorejatatsica ichoocata-
taja, pintsamajajiaquequea arimajaquea
imeshijiaquempi Quirishito pinchooca-
tantajempaca. Choocaquea aisa
ashimirintatsica itsaampimenirite
yagavejantarica yashimirincaca. Oqueje-
tacaroquea Iguenquetsatsare Aapani
Irioshi yojocajiacajica Ishire agavejan-
quemparicaquea ampatsinipae. ¹⁸Pican-
caniquea pinquenquetsatacaqueri
Aapani Irioshi, pamanamajapinjiaqueri-
queate pincantajiaqueriquea incavintsa-
jajiaquempi iramitacojiaquempi.
Pinquemisanqueriquea Ishire intsataca-
jiaquempigueti querocaca pincanqueni.
Pinquenquejamajajigue pamanaqueri-
gueti, aatoquea piperajigarotsi. Picanca-
niquea pamanacoventajiaqueri maasano
tsariventajiaatsica.

¹⁹Pamanacoventajiaquenaquate
naatimpa aisa, intsatacaguenanijiji
Aapani Irioshi quero noncanqueni
aatonijiji notsarogui nontsavetanquero-
gueti Quenquetsatsarentsi Oganejencat-
atsica teeca intsajivetempaji. ²⁰Aapani
Irioshi itigarancaquenaquea nontsave-
tanqueroquea, irootaquequea isantana-
tacotimentajitaquenaca yoishoitsijitana-
quea cavorejatsariqui. Pamanacoventaji-
quenaaja cameetsanijite nontsavetanta-
queronijite, pincantaqueriquea intampi-
shitacaquena aatonijiji notsarocaga-
rotsi, irootaquetari inintacaquena.

Interoncacaajianajerica

²¹Ariquea ichoocataquequea apitsaro-
ventarite Tiiquico apintsajigaca.

Iriatimpa yantamajatiniriqueate Amajirote. Imaica nontigarancaqueriquea iroanaquequea aviatimpajiaqui pinquemacotimentajiaquenanjite, inchiquiojitsitarite incamantajiapojempiroquea maasano. ²²Irootaquequea nontigaranquimenquerica irishinetacajaiapojempiquea intampishitacajaiapojempiquea.

²³Imaica, napitsaromentarijiate, nonintaque irishinetacajaiaquempi

Aapani Irioshi jeri aisa Amajirote Jesoquirishito inchoocatacaajiaquempiquea cameetsa, aatonijite taaca opajita pishoshomentajajatsi, aisa intampishitacajaiaquempiquea pintsaromentamajajianaquempariniji, aisa pimpintsatavacaajiaquempiniji. ²⁴Aisa nocanqueriquea incavintsajajiaqueriquea maasano pintsamajajiauitarica Amajirote Jesoquirishito.